



Fasnacht 2025

SANS GÊNE STRIZZI

E Strizzi-Schlägg und s Glacé isch ewägg

Sit 150 Joor ka me duur dr Basler Zolli laufe
und sit 70 Joor au s Zolli-Cornet kaufe.
Sälvverständlich mag e Strizzi das siesse Ding,
e Glacé vo Gasparini isch immer e Gwinn.

So beschliesst das Strizzi-Kind,
zum Zolli z laufe hüt ganz gschwind,
abr eläi, das wär doch blöod,
wär sone Nomidaag denn scho bitz ööd.
So schrybd s de andere Strizzi gschnäll,
«kunnsch au uuse, s isch jo no häll,
hesch Luscht, mit mir in Zolli z goh?»
Daas lööhn sich d Strizzi natüürlig nit entgoh!
Sii freue sich scho uff e paar schööni Stunde,
mit eme feine Glacé zämme dr Zolli z erkunde.
Bevor sii göhn go d Dier bestuune,
laufe sii zum Kiosk bi gueter Luune,
und jeede bstellt sich bim Maa an dr Kasse
e herrlig feins und iiskalts Glacé.

Dr äint het äins am Stängel gnoh,
e anderi het sich uf s Cornet verloh.
«Mmmmmh, s Vanille-Cornet isch äifach s Beschte!»
«Nääi! Muesch mol daas mit Kokos teschte.»
Wo denn ändlig alli z friide an ihrem Glacé schlägge,
seht äins vo de Strizzi am Boode e grosse Stägge,
s nimmt en in d Hand und schreit fascht bitz barsch,
«loos Strizzi, ab duur e Zolli, vorwärts, marsch!»

So laufe sii mit ihrem Glacé in dr Hand
duur das wunderschööne Zolli-Land.
D Dier hän d Strizzi natüürlig schnäll entdeggt
und hän ihri Häls scho über d Hääg drüber gschtrengt.

En Elefant säit zum andere nääbedraa,
«I möcht so gärn au mol e Zolli-Cornet ha.»
Dr Aff am Fänschter glopft uf sini Bruscht,
«Ouu, so ne Cornet, do hätt i denn Luscht!»
D Flamingos grääie in ihrem roosige Gläid
«Sone Zolli-Cornet wär jetz au nit Läid.»

«Bi so viile Sorte kunnsch jo nümmi druss,»
ghörsch vo Witem dr Vogelstruss.
S Nilpfärd sait: «Struss, jetz due nit griine,
in mi Muul passe alli Sorte gliichzeitig iine.»
Dr Storch gseht in dääne viile Glacé au e Nutze,
är baut dermit si Näscht nachdäm me s duet verputze.

Doch nit nur im Zolli sin die Glacé e Schmaus,
nääi, in ganz Basel Sorge sii für Fröid und Applaus.
Dr Lälleköönig findet die Glacé e Gnuss,
oder worum dänggsch het är sini Zunge duss?
S äinzig wo äim nit ganz losst zfriide syy,
ass d Glacé immer so schnäll muess fertig syy,
drum muesch se in volle Züüg gniesse,
abr au nit z lang, sunsch duet sii no verfliesse.

Ähnlig gohts äim, wenn s wiider vieri schloobt
und in dr ganze Stadt s Liecht abgoht.
In dääre Nacht seht me käini Stärne,
nääi, überall seht me die schöönschte Ladäärne!
Mir Strizzi fliege denn wie im Draum duur Stadt,
will s Fasnachtsfieber het uns alli paggt.
Drum kum au du in Fasnachtsgnuss
und zelebrier mit uns bis zum Schluss.
Sig au du bi unserer Rasselbandi derbyy
und entschäid di jetz, e Strizzi z syy!!

*Am Frytig, 14. und Samschtig, 15. Meerz findet uf em Barfi die
1. Lektion statt. Fasnacht für alli zum Kennelehre und Usprobiere!
jetzt-fasnacht.ch*

BISCH DERBY, E STRIZZI Z'SYY?

Am Samschtig, 15. Meerz vom zwei bis am fümfi
(14 – 17h) kasch dirägg in unserem Glyggekäller
im Gärbergässli 30 zum Schnuppere und lischryybe verbyy ko.
Oder kum ganz unverbindlig an unseri Schnupperschtund am
Donnschtig, 3. April vom säggsi bis siibni (18 – 19h) in unserem
lebigs- und Arbetskäller an dr Innere Margrethestrooss 15.
Mir freue-n-uns uff dilll

Witeri Informatione und Aamäldig
uff unserer Website
www.sansgene.ch

